

8. april 2014

UPA 2014/52
Doris Jakobsen

**Atorfimmi ileqqorlunnerup akiornissaanut Naalagaaffiit Peqatigiit isumaqatigiis-sutaannut Kalaallit Nunaata ilanngunneqarnissaanik matumalu aalajangiiffigisas-satut siunnersuutip akuerineqarnerata kingunitsianngua tamatuma sulissutigi-neqalernissaa aallartinneqaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Sara Olsvig, Inuit Ataqatigiit)**

Peqquserlulluni iluanaarniarnerup pinaveersaartinneqarnissaata anguniarneqarnissaa pillugu aalajangigassatut siunnersuut Sara Olsvig Inuit Ataqatigiinniit saqqummiunneqartoq Siumumiit imaattumik oqaaseqarfigissavarput.

Nunatsinni aatsitassarsiornikkut siuarsaanissamut takorluukkat, anguniakkat pilersinneqartussallu taama annertutigitillugit tupinnanngitsumik inatsisinik qajannaallisaaneq tamatta anguniarparput, soorlu siornatigut Inuit Ataqatigiit naalakkersuisuunerisa nalaanni Siumut sinnerlugu Inatsisartuni ilaasortaq Akitsinnguaq Olsen siunnersuuteqarnikuusooq uunga siunnersuummut assigusumik, soorlu uangattaq ukioq kingulleq siunnersuuteqarnikuusunga Naalakkersuisut pisussaaffilerneqassasut Qallunaat Naalagaaffiat attaveqarfigalugu Kalaallit Nunaat Extractive Industries Transparency Initiative (EITI – Aatsitassanik paaallutik tunisassiortartut akimut ersitsumik suleriaaseqarnissaat pillugu suliniut)-mi nunatut maalaaruteqarsinnaasutut isigineqalissasooq (candidate/compliant country status), taanna nunat tamalaat akornanni, ingammillu aatsitassarsiortunut immikkut peqquserlulluni iluanaarniartarneq pinaveersaartinniarlugu.

Siumumi isumaqarpugut, sukkulluunniit peqquserlussinnaanerit pinaveersaartinniarlugit nunarsuarmi malittarisassat atuuttut nunatsinni aamma malinnaaffigissagigut, taamaattoq ataatsimiititaliap susassaartut qulakkeertariaqarpai inatsissatut siunnersuut atuutilissagaluarpasut suut malitsigissanerai sanngiiffi, nukittoqutai il. il.

Siumumiit taamatut oqaaseqarluta, siunnersuut aappassaaneerineqartigani ataatsimiititaliami susassaartumi suliarineqarnissaa innersuussutigaarput.